

## “ AMA, PAKAWANEM IDA TA DIDA AMMO TI AR-ARAMIDENDA”- Lukas 23:34

(Umuna kadagiti pito a sao ni Jesus idia y Krus)

### PAKAUNA

Naimbag a malem ay-ayaten a kakabsat iti daytoy nga aldaw ti Biernes Santo kas sisasangotayo iti epekto iti pananglaban iti COVID19 babaen daytoy enhanced community quarantine (ECQ). Nupay saan tayo nga mabalina ti makapag-gimong, agdayaw ken agkararag kas bagi ni Cristo Jesus kadagiti ayantayo nga iglesias locales ngem mabalintayo nga aggimong, agdayaw ken agkararag kadagiti balbalaytayo.

### TEKSTO/MENSAHE

Ti umuna a sinao ni Jesus idia y krus ket: “ Ama, pakawanen ida ta dida ammo ti ar-aramidenda”. Iti kapitulo 23 ti Lucas, mabasatayo dagitoy sumaganad nga inar-aramid dagiti tattao:

- ✓ Inlansada ni Jesus isu nga awanan basol iti nagbaetan ti dua a kriminal (v. 33);
- ✓ “Nagbibingayan dagiti soldado dagiti pagan-anay ni Jesus babaen iti panagbibinnunotda”(v.34);
- ✓ “Nagtakder sadiay dagiti tattao nga agbuybuya idinto a linalais dagiti panguloen a Judio... Isalakanna man ngarud ti bagina no isu ti Cristo a pinili ti Dios!”(v. 35);
- ✓ “Linalais met dagiti soldado. Immasidegda ken ni Jesus sada inyawat iti suka. Isalakanmo ta bagim,no sika ti Ari dagiti Judio! Kinunada” (vs. 36-37);
- ✓ Pinabpabainan ti maysa kadagiti kriminal a nailansa. Saan kadi a sika ti Cristo? Kinunana. Isalakanmo ngarud ta bagim ket isalakannakami met!” (v.39).

Iti isumet laeng nga kapitulo 23 ti Lucas, mabasa ti testimonio ti maysa kadagiti kriminal: **“Dika aya agbuteng iti Dios!”**(v. 40)... **“Rebbengna nga agsagabata gapu iti inaramidta. Ngem daytoy a tao,awan dakes nga inaramidna”**(v.41). Daytoy nga testimonio ti maysa a kriminal ket mapatalgedan ti sao ni Jesus: “Ama, pakawanem ida ta dida ammo ti ar-aramidenda”.

Ania met ngata ti mensahena kadatayo ita daytoy a sao ni Jesus idia y Krus: “Ama, pakawanem ida ta dida ammo ti ar-aramidenda”. Idi naideklara nga ti isla ti Luzon ket sakupen ti enhance community quarantine (ECQ) gapu iti daytoy global pandemic COVID19. Agduduma ti rinumuar a reaksyon dagiti tattao nangruna ta maiyunay-unay ti social distancing ken kangrunaan ti panagtalinaed iti balay tapno labanan ti panag-adu ti maakaran: Idi maparitan uray panagraragup iti uneg ti kapilya, kunada, ayanna ngay ti pammati?. Dadduma kunada nga makatipidda ta balay laeng ti pagyananda ket saanda makapan ti mall. Kasta met nga adda agkuna nga kalinteganda ti rumuar ken agpasyar. Nupay adda latta nasubeg, daytoy nga direktiba ket rumbeng nga tungpalen para iti pagsayaatan ti tunggal maysa, pamilia ken ili. Kunana iti Isaias 26:20: “Dakayo a tattaok, sumrekkayo kadgiti balbalayyo ket serraanyo dagiti ridaw. Aglemmengkayo pay laeng aginga nga agbaaw ti pungtot ti Dios”.

Adda panpanunonot a ti COVID19 ket aramid ti kabusor wenna ni satanas ngem adda met agkuna nga daytoy ket bunga iti dakes nga aramid ti tao. **Para kaniak, mabalin nga dagitoy ket epekto ti makunkuna nga “ecological backlash”** kayatna a saoen nga amin nga aramid ti tao a saan nga nasayaat ket agsubli met laeng iti tao. Gapu iti panadadael ti aglawlaw uray ti “web of life ket maperdi” agresulta iti panagraira ken panakapaadda dagiti nadumaduma a virus kas ti COVID19. Gapu iti kamali nga aramid ken prioridad nga agresulta ti panakadadael iti aglawlaw wenna nakaparsuaan umay ti sakit, dedigra ken panagrigat.

Ti sao ni Jesus idia y Krus nasurok dua ribu a tawen ti napalabas ket ibagbagana kadatayo ita: **“Ama, pakawanem ida ta dida ammo ti ar-aramidenda”**.